



Efnahags- og viðskiptanefnd
nefndarsvið@althingi.is

Reykjavík, 31. janúar 2024
Tilvísun: 2401242 JÞ

Umsögn um frumvarp um breytingu á lögum um staðgreiðslu opinberra gjalda, lögum um tryggingagjald og lögum um tekjuskatt (náttúruhamfarir í Grindavíkurbæ), 616. mál.

Vísað er til tölvupósts frá nefndasviði Alþingis dags. 30. janúar 2024 þar sem óskað er eftir umsögn Grindavíkurbæjar um ofangreint mál.

Almennt um frumvarpið

Í frumvarpinu er lögð til framlenging á þremur bráðabirgðaákvæðum á sviði skattamála til að koma til móts við vanda einstaklinga og rekstraraðila vegna náttúruhamfaranna í Grindavíkurbæ, sbr. lög nr. 102/2023. Greiðslur sem frestað er samkvæmt fyrrgreindum lögum myndu að óbreyttu falla í gjalddaga og eindaga 15. apríl 2024 enda hafi skilyrði frestunar verið til staðar. Í frumvarpi þessu er nú lagt til að launagreiðendur sem eiga í tímabundnum rekstrarörðugleikum vegna tekjufalls geti óskað eftir greiðslufresti á greiðslum í ríkissjóð á afdreginni staðgreiðslu tekjuskatts, útsvars og tryggingagjalds sem falla mun í gjalddaga 1. mars 2024 til og með 1. júlí 2024, og verður nýr gjalddagi og eindagi þeirra 15. janúar 2025. Jafnframt er lagt til að launagreiðendum sem frestað hafa greiðslum til eindaga 15. janúar 2025 verði heimilað að sækja um að fresta þeim greiðslum þannig að þær skiptist á fjóra gjalddaga og verða gjalddagar og eindagar þeirra 15. september, 15. október, 17. nóvember og 15. desember 2025. Verði breytingatillögurnar að lögum verður launagreiðendum gert auðveldara að standa í skilum og má gera ráð fyrir að það styrki áframhaldandi rekstrargrundvöll þeirra.

Heimild til að fresta staðgreiðslu tekjuskatts, útsvars og tryggingagjalds sem mælt er fyrir í frumvarpi þessu er ætlað að milda neikvæð áhrif tekjusamdráttar af völdum náttúruhamfara á lausafjárstöðu rekstraraðila í Grindavíkurbæ. Heimildin frestar gjalddögum og gerir rekstraraðilum því kleift að halda viðkomandi fjármunum tímabundið. Eins og fram kemur í 6. kafla í skýringum við frumvarpið beinist lagabreytingin að afmörkuðum hópi launagreiðenda og hefur breytingin því mjög takmörkuð áhrif á ríkissjóð. Lítil nýting núgildandi úrræðis í desember 2023 og janúar 2024 styður þá ályktun.

Að auki kveður frumvarpið á um að ákvæði til bráðabirgða LXXVII í lögum um tekjuskatt, nr. 90/2003, verði framlengt um þrjá mánuði, þ.e. til loka aprílmánaðar 2024, en ákvæðið kveður á um að sérstök eftirgjöf vaxta og verðbóta, af skuldum manna utan atvinnurekstrar, vegna nóvember og desember 2023 og janúar 2024, af lánum sem tekin hafa verið vegna kaupa eða



byggingar á íbúðarhúsnæði til eigin nota, teljist ekki til skattskyldra tekna við álagningu opinberra gjalda á árunum 2024 og 2025 að því gefnu að um sé að ræða vexti og verðbætur vegna áhvílandi lána á íbúðarhúsnæði.

Afstaða Grindavíkurbæjar

Grindavíkurbær er sammála efni 1. og 2. gr. frumvarpsins enda er markmið ákvæðisins að auka viðnámsþrótt þeirra fyrirtækja sem nýta sér úrræði frumvarpsins til að fresta skattgreiðslum. Ljóst er þó að samhliða þarf að tryggja frekari stuðning við fyrirtæki til að halda áfram starfsemi, eftir atvikum með því að hefja starfsemi utan Grindavíkur á meðan óvissa er um frekari áhrif náttúruhamfara á bæjarfélagið.

Til framtíðar litið þarf að tryggja með öllum ráðum að það blómlega atvinnulíf sem hefur einkennt Grindavík muni halda áfram að dafna. Árangur í því verkefni er alger forsenda fyrir því að mögulegt verði að vinna að endurreisn Grindavíkurbæjar.

Líkt og fram kemur í 6. kafla í skýringum ætti frumvarpið ekki að hafa neikvæð áhrif á fjárhag Grindavíkurbæjar þar sem ríkissjóður mun fjármagna þann hluta staðgreiðslu launagreiðenda sem tilheyrir sveitarfélaginu vegna útsvars og tryggja greiðslur á réttum tíma. Þetta er mikilvægt enda er fyrir séð að tekjur sveitarfélagsins af fasteignaskatti og þjónustugjöldum muni skerðast mikið á árinu. Tekjur af útsvari munu líklega einnig skerðast nokkuð þótt óvíst sé á þessu stigi hvaða áhrif náttúruhamfarir kunni að hafa á atvinnutekjur Grindavíkinga og fjölda útsvarsgreiðenda í sveitarfélaginu en báðir þessir þættir geta haft mikil áhrif á útsvarsstofninn.

Grindavíkurbær styður einnig markmið 3. gr. frumvarpsins, um að eftirgjöf vaxta og verðbóta af húsnæðislánum verði undanþegin skattskyldu. Grindavíkurbær hvetur þó þingnefndina til að skoða sérstaklega hvort gildistími 3. gr. ætti frekar að vera til 30. júní þannig að ekki þurfi að breyta lögum ef samkomulag við fjármálastofnanir verður framlengt lengur en til 30. apríl.

f.h. Grindavíkurbæjar

Jón Þórisson, sviðsstjóri fjármála- og stjórnsýslusviðs

jont@grindavik.is



Grindavíkurbær
Sviðsstjóri fjármála-
og stjórnsýslusviðs